





4 214



DEFAITE DE L'ARMÉE

DV COMTE DE TILLY,

LIEUTENANT GENERAL

de l'Empereur.

PAR LE ROY DE SUEDE.

*Avec la prise de huit cens Chariots chargez
de viures, vingt-sept pieces de Canons,
tout le bagage, quantité de Drapeaux,
vingt-neuf Cornettes, & le nombre des
morts, blessez, & prisonniers.*

Ensemble la Relation de l'entiere deliurance de
toute la Prouince de la Pomeranie & Mekle-
bourg, par ledit Roy de Suede,

✂✂

✂✂

A R O V E N,

Chez I A C Q V E S C A I L L O ù E, tenant sa
boutique dans la Court du Palais.

Iouxtela Copie Imprimée à Paris par Iean Martin,

M. DC. XXXI.

A V E C P E R M I S S I O N.


Case

F

39

326

1631 de



LA DEFAITE

DV GENERAL TILLY

par le Roy de Suede.

*Avec la prise de vingt-neuf Cornettes,
plus de mille Cheuaux, & quantité
de munitions & bagage, le nombre
des morts, & le nom des principaux
Chefs, tant blesez que pris prison-
niers.*



Ly peut auoir enuiron quatre ans,
que les Ministres & Chefs du Con-
seil & de l'armée de l'Empereur,
auoient trouué moyen par leurs
frauduleux artifices de se saisir de
la Pomeranie, sous pretexte d'y vouloir passer
quelques mois pour se rafraischir.

Ceux du pays s'estans laissez insensiblement
aller à leurs fausses inductions, & les ayans hu-
mainement receus pour le temps qu'ils deman-
doient.

4
Les Imperialistes (comme s'ils eussent con-
quis ceste Prouince à viue force d'armes) sous
cette faulxe imagination de conqueste , comme
c'est leur coustume , s'y sont gouuernez si tyra-
niquement, l'ont violente & accablee de telles
& si angoisseuses miseres & calamitez , que la
posterité n'en pourra pas lire le discours sans en
auoir horreur.

Ceste pernicieuse ruzauoit tellement assou-
py les sens des politiques (qui ayment mieux
temporiser , que de troubler la paix & le repos
d'un Estat) qu'ils ne penetroyent pas dans la
malice Espagnole , excepté ceux de la ville de
Stralsundt , qu'encor que les ruzes des gens
(ou plustost monstres du Colonel Walstein) les
auoient de telle sorte endormis, qu'ils se fussent
laissez en seuelir dans leur ruine sans le secours
de deux Roys voisins , que Dieu Tres-puissant
& tres-misericordieux leur a suscité pour estre
les arcs-boutans de la liberté Germanique, spe-
cialement du Roy de Suede (ainsi que chacun
peut clairement voir & cognoistre: car il a chas-
sé vn puissant ennemy, non seulement de tou-
tes les Isles , villes & passages de la Pomeranie
(dans laquelle se retrouue plusieurs places de
guerre aussi fortes qu'il y en ayt en toute l'Ale-
magne) non par stratagemes , deceptions & ca-
uillations: mais à force ouuerte , en quoy il a
esté tellement fauorisé du Ciel , qu'il les a con-
trainct de s'enfuir honteusement au trauers des
plus violentes froidures de l'Hyuer , durant le-
quel il s'est emparé de plusieurs passages, & leur

a enleué toutes leurs forteresses, comme Ribnitz, Gripenhagen, Garts, Lochnitz Klempe-
nou, Loits, & contraint les Imperialistes qui
restoient en la ville de Colberg de se rendre
& l'abandonner. Il a pris aussi la ville de Dem-
min, que l'Histoire des Vandales appelle
inexpugnable, l'ayant fait inuestir le qua-
trième de Feurier par la Cavalerie qu'il y a en-
voyée de l'Isle de Rugie, & deux mille cinq cens
hommes de pied des villes plus proches avec
cinq canons; Et le douzième du mesme mois
planta son Camp devant icelle, & devant la Ci-
tadelle, dans laquelle commandoit le Duc de
Sauelly, la prit de force avec sept Drappeaux
du Colonel Holck: Et le quatriesme emporta
aussi la ville, où fut trouué grande quantité de
canons, de poudres & de viures, & a mis fin à ce
siege si heureusement que sa valeur le meritoit,
s'estant par ceste prise ouvert le passage iusques
à la Marke de Brandebourg, en laquelle les
beaux exploits de guerre qu'il y a executé au
commencement de cet Esté (laissant à part ce
qu'il a fait au pays de Meklebourg) sont assez
notoires. Comme donc il ne restast de toute
cette vsurpation en toute la Pomeranie, que la
seule ville de Gripswald, laquelle se trouue
auoir plus souffert de toutes ces oppressions
& tyrannies que toutes les autres villes, ius-
ques à auoir esté les habitans d'icelle contraints
de faire battre de la monnoye de leur vaisselle
d'estain, pour contenter la garnison des Impe-
rialistes qui estoit dedans, apres auoir esté par

eux mis au pressoir & tiré iusques à la dernière piece d'argent de leurs coffres pour satisfaire à leurs contributions, Mais en fin Dieu par sa clemence & debonnaireté , les a deliurez de ceste pernicieuse & insupportable tyrânie. Car l'vnziesme de Iuin entre six & sept, quelque cavalerie Suedoise ayant paru deuant la porte de Stremberge, pour enleuer les bestiaux que les Imperialistes auoient de coustume de mettre dehors par ceste porte , qu'ils auoient neantmoins fait sortir ce iour là par vne autre, les Suedois ne voulans perdre leur peine, & s'en retourner sans rien faire, donnerent l'alarme à la ville avec vn coup de pistolet qui fut tiré pour faire sortir l'ennemy.

Aussi tost la trompette sonne à cheual, la Cavalerie sort incontinent en quatre ou cinq troupes suiuite du Gouverneur & du Sergent Major & d'un cheualier de la Croisade. Ceux-cy ayans fait quelque peu de chemin hors la ville, ils apperçoient de loing les Suedois, ce qu'ils firent sçauoir au Gouverneur, & attendant son commandement font halte: mais sans attendre, le Gouverneur se desbande & s'en va au combat avec le Cheualier susdit: le Lieutenant & le Sergent Major s'en retournent à la ville.

Ledit Gouverneur s'estant vn peu inconsidéré auancé, quelques Cavaliers qui s'estoient mis en embuscade, se descouurent, luy coupent le chemin qu'il vouloit prendre pour s'en retourner.

Les Imperialistes se voyans pressezz, retour-

dent visage, & l'espouuante les ayant saisis, se desbandent: les vns se sauuent à la nage, & les autres sont enuironnez & taillez en pieces. Le Gouverneur & le Cheualier, pensant regagner la ville, sont enuoloppez. D'abord le Cheualier y est tué. Le Gouverneur bien armé, soustient le premier coup de pistolet: mais vn autre Gendarme luy ayant abordé, luy porte son coup de pistolet dans la face, le perce & luy oste la chaîne d'or, qu'il auoit au col, le corps est porté à Neukichen, Monastere proche de là, embaumé & gardé iusqu'à ce que la ville se soit rendue. Ainsi ce Gouverneur, qui en derisió de l'Vniuersité de cette ville, auoit pris le bonnet rouge, se trouue l'auoir en effect par l'effusion de son sang; dót ce coup de pistolet luy auoit atteint toute la teste. A l'instár la Cavalerie Suedoise, secondee des gens de pied, qui auoyent cheminé toute la nuit, inuestit la ville: vne heure apres l'armée fait sçauoir son arriuée par le bruit des canons qui estoient en icelle: au son desquels la ville est sommee de se rendre, & sur la responce que ceux de dedans font, qu'ils se vouloient defendre, le lendemain la batterie est dressée avec les retranchemens.

Le treiziesme Iuin entre cinq & six heures, les Imperialistes firent vne rude sortie sur les Suedois, en laquelle il y en demeura de part, & d'autre: & y auoit danger si la Cavalerie ne fust promptement arriuee au secours, que les assiegeans n'eussent esté cōtraints de se retirer: mais ce rafraischissement, & leurs canons qu'ils fi-

rent louer au mesme temps, leur conserva leur aduantage: De sorte que le Mardy ensuiuant le Roy de Suede enuoye derechef sommer la ville avec menasse, qui fut cause qu'il y eut trefue du Mardy au Mercredy, & fut la reddition de la place arrestée & resoluë.

Le seiziesme Iuin entre quatre & cinq heures du matin, les assiegez sortirent de la ville avec armes & bagage, en nombre de mil sept cens: & furent conduits par les Suedois à Loitz.

Par cette prise, tout le Duché de Pomeranie miserablement & tyranniquement affligé & trauaillé, se trouue par la bonté Diuine entiere-ment deliuré: pour laquelle deliurance elle rend graces infinies à Dieu, tres-bon, & tres-puissant.

Si la Pomeranie a occasion de se resiouyr de l'expulsion des Imperialistes, la Prouince de la Marke, haute, basse, & nouuelle, n'en a pas moins. Car lesdits Imperialistes estans entrez captieusement par les mesmes artifices qu'ils auoient vsurpé en la Pomeranie, y ont exercé toutes sortes de violences, extortions, & actes d'hostilité, iusques à ce que le Roy de Suede y estant entré avec ses forces, a fait sortir ses oyseaux de rapine hors des nids qui n'estoient pas à eux. Et les villes principales dont ils ont esté chassez sont, Francfort sur la riuier de l'Oder, Landsberg, Brandembourg vieille & nouuelle.

Car quand à Spandau & Custrin, places de guerre

guerre tres-fortes, ledit Roy les a obtenues à certaines conditions de l'Electeur de Brandebourg, lequel en partie, amadoüé par les belles promesses des Imperialistes, & estonné de leurs menaces (non sans vn grand retardement de ses affaires.) Il l'a porté en fin à prendre le meilleur conseil. Outre cela estant entré dās le Duché de Meklebourg, a recouré plusieurs places occupees desdits Imperialistes, & afin d'oster tout l'ombrage & la défiance en laquelle on eust peu entrer, qu'il eust dessein de faire son heritage desdites places reconquises: il a persuadé aux Ducs de Meklebourg, Frideric Adolphe, & Iean Albert, d'assembler des forces, & leur ayant donné des Regiments de son armee à cet effect, leur a persuadé de redemander à l'Empereur leur pays qu'il leur auoit iniustement rauy en faueur de Vvalestein. Ce qui a fait que les Imperialistes ont en partie quitté volontairement, & sans contrainte, les places qu'ils occupoient dans ledit Duché, & ceux qui y ont voulu faire resistance en ont esté chassés par la force, excepté trois; à sçauoir Rostoch que le Duc Iean Albert tient maintenant assié- gé, & Vvismar, deuant laquelle le Colonel Tode a aussi mis le Siege, & Damnits, deuant lequel est le Duc Frideric Adolphe; lesquelles places pour se trouuer mal pourueuës de ce qui est necessaire pour soustenir vn siege, & d'autre part destituees d'esperance d'estre secouruës: on croit qu'elles seront dans peu de temps contraintes de se rendre.

Le Roy après auoir fait toutes ses choses, donne ordre à bien faire fortifier la ville d'Albrandembourg, afin de luy seruir de retraite au besoin, ayant amassé le plus de troupes qu'il a peu, à dessein de purger toutes les Provinces, & les deliurer des vsurpateurs.

Enuiron le cōmencement du mois de Iuillet il a passé la riuere d'Elbe, & apres auoir pris Tangermond, il y a fait faire vn pont de bateaux & l'a fortifié. Et puis estant entré dans le Diocese de Magdebourg & dans la partie de la Prouince de la Marke, qui est au delà de ladite riuere d'Elbe, il a fait tout ce qui a esté en son pouuoir, pour deliurer les pauures habitans des extortions & violences de ceux qui les rendoiēt miserables : Et premierement pour accomplir ce dessein, il s'est efforcé de deffaire le Colonel Papenheim, que le Comte de Tilly auoit laissé en garnison en ces quartiers là : Mais luy ayant preueu le danger, apres vne grande perte de son arrieregarde, s'est retiré à la fuite à Halberstad, ville qui est dans le pays de Brunswic. Le Roy estoit en volonté d'assiéger de nouveau Magdebourg : mais en ayant esté empesché par l'armée de Tilly, proche de là, & d'autre part, par l'irresolution du Duc de Saxe il a changé de dessein. Le Comte de Tilly donc ayant entendu cecy, estant remonté vers la riuere d'Elbe, quittant Mulhuse, ville du pays de Thuringe, où il auoit pris son quartier, ayant laissé à Magdebourg des marques eternelles de sa cruauté, & venant à Halberstad prit les Regiments qu'il

auoit laissez au Colonel Papenheim le 14. de Juillet, selon le vieil Calendrier, & s'en alla au deuant du Roy de Suede, qui alors auoit son armee entre Tangermond & Vvolmerstad, & a planté son Camp à Vvolmerstad. Mais le Roy euitant le peril qui estoit proche : (car il n'estoit qu'à deux lieux de l'ennemy) s'en est allé à Tangermonde, distant de cinq lieux de Vvolmerstad. Le Comte de Tilly au contraire desireux de combattre, ne pouuât retenir ses gens à cause de la grande necessité de viures, & principalement de l'eau, en laquelle ils estoient, prenoit l'occasion de venir aux mains : Et pour ce, craignant que le Roy de Suede se retirast en lieu de seureté, il enuoya deuant luy quatre Regiments choisis, afin de le tirer hors du lieu aduantageux où il estoit, & l'arrester le plus qu'ils pourroient en escarmouchant, iusqu'à ce qu'il arriuaist avec le gros de son armee. Ces quatre Regimens commandez par les Colonels Bernstein, Holk, Montecuculi, & Coronino, se trouuans la nuit sur les bras, se resolurent de coucher à vn Bourg appellé Tanger, distant environ d'une lieue de Tangermonde.

Ce qu'ayant esté recogneu par les espions, le Roy y enuoya deux mille chevaux & cinq cens Dragons, sous la conduite du Colonel Calem bach, où (comme d'autres escriuent) 2000. chevaux & 3000. hommes de pied, ayans pour leurs chefs le Rhingraue, les Colonels Strif & Ditri gen, lesquels à la pointe du iour, les autres durent de nuit, arriuerent au rendez-vous, & en-

trans dans Tanger, donnerent ordre que la Trompette sonnast vne Chanson que les Imperialistes auoient de coustume de chanter. A sçauoir, *Tous les iours, tous les iours, il s'en va comme cela. Si ie n'ay point de Matelas ie dors sur la paillasse.*

Le Colonel Claus menoit l'auant-garde, qui attaquafurieusement le Regiment de Bernstein, composé de six cens chevaux, estant pour lors en garde, lequel apres vn rude combat, fut defait & taillé en pieces: Le reste de la Cavalerie deuant qu'il peust estre à cheual, fut aussi defait, & presque mis en pieces: De sorte que la plus grande partie de ces quatre Regiments ayant esté tuee ou prise prisonniere, il ne s'en est guere sauué à la fuite: Le Colonel Bernstein mesme, ayant euen ce combat le cœur percé d'un coup de pistolet, fut porté mort à Magdebourg. Le Colonel Montecuculi le ieune fut porté en l'armee du Roy de Suede, estant blessé à mort. On tient que les Colonels Holk & Coronino se sont sauez avec trois compagnies de Cavalerie: & toutesfois son Lieutenant nommé Trus, qui auoit causé vne infinité de maux & de ruines aux habitans de pays là, a esté pris avec plusieurs autres. Les Suedois entre les despoüilles des ennemis y ont gagné plus de mille chevaux: les vns escriuent deux mille, avec vne grande multitude de bagage & de butin, estimé quelques centaines de mille liures: dix Cornettes de Bernstein, six de Holk, cinq de Montecuculi, & huit du Coronino: qui sont en

tout vingtneuf, lesquelles ils ont remporté de
 cette defaite. Plusieurs Soldats qui estoient al-
 lez à pied à l'armée, s'en sont retournez à cheval
 Ont tient que si les Suedois n'eussent point esté
 si aspres au pillage, ils pouuoient dans ce desor-
 dre defaire toute l'armée de Tilly. Cette remar-
 quable victoire a esté obtenüe des Suedois le
 dixseptième de Iuillet (selõ le vieil Calendrier)
 & croit-on que le Roy mesme s'est trouué en ce
 combat. Le Comte de Tilly ayant eu nouuelle
 de cette defaite, fut fort estonné, principale-
 ment de ce qu'il a veu que tout son Conseil, &
 le bon ordre qu'il croyoit auoir donné à ses af-
 faires, a esté inutile, & qu'il se falloit seruir do-
 resnauant d'autres voyes pour faire la guerre, &
 pource bruslant de desir d'en auoir la raison:
 mais principalement pour voir son armée re-
 duite dans de grandes necessitez, a fait tout ce
 qu'il a peu pour attirer les Suedois au combat.
 Mais le Roy ne voulant perdre l'honneur de sa
 victoire, s'est tenu dans son camp, & dans la
 ville de Tangermond.

Les dernieres nouuelles nous font scauoir,
 que le Comte de Tilly ayant mis son armée en
 bataille, a demeuré quelques heures planté de-
 uant celle des Suedois: Mais comme ils n'ont
 pas voulu sortir de leur camp, il a esté en fin les
 attaquer par quelques escarmouches: mais tous
 ses efforts ont esté vains: car les Suedois les ont
 vaillamment repoussez, & le combat a esté si rude,
 qu'il est demeuré sur la place sept mil des gens
 de Tilly: Et ayant perdu en ce combat huit cens

chariots chargez de viures, a esté contraint de se retirer. Quelques vns disent, que le Roy luy mesme, non dans ses retranchemens, mais en pleine compagne, en bataille rangée l'a combattu, qu'il est demeuré dix mil des Imperiaux morts sur la place, vingtsept pieces de canons, avec tout le bagage, & quantité de drapeaux pris. Ce cōbat a esté fait à Tangermōd. Toutes les particularitez ne sont pas encore cogneuës: mais chacun est d'accord que le Roy a emporté vne signalee victoire sur le Comte de Tilly, le iour de Saint Iacques 25. dudit mois. Il est bien vray aussi que le Roy de Suede environ le commencement d'Aoust, estant sorty de Tangermond, a tiré avec son armee du costé de la ville de Vverben: où apres auoir fait vn pont, ayant recogneu qu'Hauelsberg, estant vn passage de grande importance, estoit pris de force par les siens, a passé la riuiera d'Elbe, en cét endroit où l'Elbe & Huel se ioignent, où il a planté son camp, attendant les nouuelles de la resolution de Tilly.

Au commencement dudit mois d'Aoust, le Duc de Saxe ayant fait accord avec le Roy de Suede, & assemblé vne armee composee de treize Regimens de gens de pied, & cinq de gens de cheual, tira par Eislefeld vers le pays de Hesse pour donner secours au Landgraue, à l'encōtre duquel le Comte de Furstemberg s'en va avec dixhuit mil hommes des vieux Regiments qui sont de retour d'Italie depuis peu. Si ledit Duc de Saxe, comme le Roy de Suede est

favorisé de la fortune en ses desseins, en peu de
temps on peut esperer vn changement aux af-
faires d'Alemagne, qui sera autrement au con-
tentement de l'Empire, que l'estat où il est
maintenant.

F I N.

